

潼关志

一
函
四
册

新
平
縣
志

PDG

潼關志序

秦爲四塞之國舉其全體而論
之河西四郡通西域諸國猶尾
閭也上郡以北其背脊也度棧
閣則入巴蜀出商洛則走襄鄧
皆枝股也惟潼關披山帶河東

面而臨韓魏鄭宋齊魯諸國唐
人謂其雄三輔而扼九州良非
夸語秦之咽吻其在是乎在昔
成周盛時建都豐鎬耑務德化
此地未聞以險稱東遷之後秦
有蠶食六國之心始據函谷爲

國自是沿漢迄唐遂無弗稱要
害矣雖秦之函谷去今關一百
二十里漢武好大更徙而之新
安唐天授中始建關於今地其
建置不同稱名亦異而總以一
關綰全秦之口莫不遣重臣設

重兵以守之今

聖人在宥文德覃敷薄海內外罔
不臣服載籍所稱櫜矢戢干放
牛歸馬之盛復覩於茲日則此
地似亦無闕於輕重之數然秦
爲

神京右臂寧可以世際昇平而
泄泄沓沓於王公守國之意遂
漫不留之意哉予不佞濫筦茲

闔鎖鑰抵官之後單騎按行郊
野求古人之遺蹟茫然無有識
者博訪文獻亦苦無徵間謀之

於郡丞撫民唐君君固夙有志
於修舉廢墜者乃以其所藏弄
鄉大夫楊君衛志抄本一冊示
予受而卒讀而嘆作者之用意
誠遠矣他郡國之志雖山陬海
澨輒稱僻左之區而語山川則

十洲三島咸在几席語人物則
伊周魯閔比處里閭語門第則
巷皆烏衣馬糞之家也語土產
則物皆南金東箭之良也言雖
美玉卮何當茲志舉其凡亦畧
如郡國之體而其言質而不夸

核而有徵無文勝之誚且兵志
一篇於古今戰守之已事言之
不厭其詳蓋使人知潼志之作
其所重固在此而不在彼也楊
君由名進士出宰百里清操惠
政雅稱清白吏子孫解組歸田

文詠日富乃於蟬穿鼠齧之餘
保此一冊以爲後人考鏡予嘉
其意爰付剞劂俾覽者識全秦
之要害所在以正養願而不爲
臟腑之患則茲編亦經世之一
助已

時

康熙二十有四年歲次乙丑季
夏之吉

陝西承宣布政使司分守潼商
道叅政東魯高夢說撰



潼關志序

嘗觀春秋時楚史猗相能讀九
丘之書疑風土人物貢賦古各
有書所以昭往察來弗廢則爲
失職顧九丘不可考而山海一
經荒遠難稽禹貢而下莫詳於

周禮之述職方斯則志乘之權
輿歟今天下郡邑星羅碁布莫
不各有志矣愚以爲潼關志爲
尤亟按僧一行以爲天下之山
河存乎兩戒北戒自三危積石

嶺終南地絡之陰東走太華以

至於潼南戒自岷山嶓冢負地
絡之陽東走太華以至於潼而
地絡會於一則潼者固兩戒之
會區也太史公曰雍州積高神
明隩區據六合之上游得百二
之形勝所以東制諸侯而成建

鎭之勢者翳惟關是賴關實全
秦之襟喉也有明屬直隸與紫
荆居庸山海等關並稱屹然爲
神京右臂闕又天下之扼要也

昭代提封萬國海山一家以潼關

隸秦猶具隸京師也然則關志

不可一日無也審矣余甲子秋
奉

命過此南瞻秦嶺北望渭洛岳勢

鬱怒河流決漕未嘗不歎其山

川之巖險而居民城郭滿目荒

涼進諸掌故多缺焉未脩輒低

徊久之乙丑春始遇

高公叅藩茲土百廢具興毅然

以志書爲已任關人樹滋楊君

博雅好古具有成藁遂相與刪

繁補漏纂輯成書地理之險易

建置之廢興禋祀之次第田賦